

## Morning Dogri (NSD) National News Bulletin 28-10-2024

### आकाशवाणी

- प्रधानमंत्री नरेन्द्र मोदी होर सी-295 बनगी दे फौजी हवाईज्हाजें दे निर्माण लेई एयरक्रॉफ्ट परीसर दा उद्घाटन करगंन।
- पच्छमी रेलवे दे सीपीआरओ होरें आक्खेया जे भुज-नलिया रेलवे पटरी दे चैड़ा होने कारण कच्छ ईलाके च सैलसफा बढौग ते आर्थिक गतिविधिं च ईजाफा होग।
- केन्द्री मंत्री प्रल्हाद जोशी होरें आक्खेया जे सरकार 185 लक्ख मिट्रिक टन मूंजी दी खुशखरीद करोग।
- जापान दी सत्तारूढ़ गठबंधन सरकार ने तारें होए दे राष्ट्री चुनावें दौरान संसद च अपना बहुमत मुआई दित्ता ऐ।
- टेबल टेनिस च यशस्वनी ते कृतविका दी भारतीय जोड़ी नै फीडर कैगलियारी प्रतियोगिता च महिला डबल्स दा खिताब जित्ती लैता ऐ।
- कुश्ती च भारतीय पैहलवान चिराग नै अंडर-23 विश्व कुश्ती प्रतियोगिता दे फाइनल च किरगीस्तान दे अब्दुमलिक काराचोव गी हराइयै सुन्ने दा तगमा जित्तेआ।



### PM-Gujrat

प्रधानमंत्री नरेन्द्र मोदी ते स्पेन दे उंदे हमरूतबा पेट्रो सांचेज होर अज्ज बड़ोदरा च फौजी जहाज सी-295 गी तैआर करने लेई टाटा जहाज परिसर दा सांझे तौर पर उद्घाटन करगंन। जहाजें सरबंधी खेत्तर च मेक इन इंडिया दी एह मुख् परियोजना ऐ। टाटा दे अलावा रक्षा खेत्तर दे अगुंआं सार्वजनिक युनिट जियां भारत इलैक्ट्रानिक्स लिमिटेड ते भारत डायनामिक लिमिटेड दे कन्नो कन्नी निजी एमएसएमई बी इस प्रोग्राम लेई खरा मता योगदान देंगन। बड़ोदरा पुज्जने पर दौने नेता उत्थें इक रोड शो करगंन ते मगरा उंदे बश्कार डेलीगेशन स्तरे दी गल्लबात बी होग। टाटा एयरबस प्रोजेक्ट भारत दा फौजी दा जहाजें दे निर्माण लेई मेक इन इंडिया पैहल तैह्त पैहला-पैहला प्रोजेक्ट ऐ ते एह भारत ते स्पेन बश्कार बधदे रणनीतिक रक्षा सरबंधें दे महत्व गी बी दर्शादा ऐ।

इस परियोजना तैहत भारत लेई कुल 56, सी-295 फौजी जहाज तैआर कीते जाने न ते इंदे चा 40 जहाज बड़ोदरा च टाटा परिसर च तैआर कीते जांगन जदके बाकी दे 16 जहाज स्पेन पास्सेआ इत्थें भेजे जांगन। एह जहाज भारती वायु सेना दी समर्थ बधाने लेई केई देसी तकनीकें कन्नै लैस होंगन ते एह अपने कन्नै 71 जहाजें चा 49-50 पैरा ट्रूपरें गी लेइयै जाने दी समर्थ रखगंन। मेद ऐ जे एह जहाज सितम्बर 2026 तगर बनियै तैआर होई जांगन। मगरा दौनें नेता बड़ोदरा दे मशहूर लक्ष्मी विलास पैलेस जांगन ते डेलीगेशन स्तरै दी गल्लबात करगंन।



## PM-Kutch

प्रधानमंत्री नरेन्द्र मोदी होर गुजरात च अमरेली थमां वीडियो कांफ्रेंस दे राएं अज्ज भुज-नलिया रेल लाईन दी पटरी गी चैड़ा करने सरबंधी परियोजना दा उदघाटन करगंन। 101.4 किलोमीटर लम्मी इस रेल लाईन परियोजना गी तकरीबन 1 जहार 100 करोड़ रपे दी लागत कन्नै पूरा कीता गोआ ऐ। इस बारे आकाशवाणी खबरें कन्नै गल्ल करदे होई पच्छमी रेलवे दे मुख् जन संपर्क अधिकारी बिनीत अभिषेक होरें दस्सेआ जे एह परियोजना सस्ती आओजाई दी सुविधा उपलब्ध करोआने दे कन्नो कन्नी गुजरात दे कच्छ खित्ते च आर्थिक गतिविधिएं गी बी बढ़ावा देग। साढ़े संवाददाता दी रिपोर्ट मूजब इस नरियोजना दे दायरे हेठ 24 बड्डे पुलें, 254 लौहके पुलें, 3 शिड़क ओवर ब्रिजें ते 30 शिड़क अंडरब्रिजें गी औंदा गोआ ऐ। एह परियोजना कच्छ दे समाजी-आर्थिक विकास च बड़ी महत्वै आली भूमिका नभा ते एहदे कन्नै सैलसफा ते रोजगार च बी बाद्धा होग। खित्ते च स्थित सीमेंट उद्योगें गी बी इस प्रोजेक्ट दा खरा मता लाह थ्होग। एह परियोजना कच्छ जिले च बंदरगाहेंदे राएं आयात-निर्यात गी बी खरा मता बढ़वा देग।



## Rice

उपभोक्ता मामलेखुराक ते सार्वजनिक बंड सरबंधी मैहकमे दे केन्द्री मंत्री प्रहलाद जोशी होरें अज्ज आखेआ ऐ जे सोनी फसलें दी रूत्त 2024-25 लेई तैह 125 लक्ख मिट्रिक टन मुंजी दी खरीददारी कीती जाग।

नमीं दिल्ली च इक संवाददाता सम्मेलन गी संबोधत करदे होई श्री जोशी होरें घोषणा कीती जे चौल मिल मालकें दी शकैत दा नबेड़ा करने लेई इक ऑनलाइन पोर्टल दी शुरुआत तौले कीती जाग तां जे हित-धारकें दी कुसै चाल्ली दी मुश्कलें दा नबेड़ा तौले कीता जाई सकै। श्री जोशी होरें दस्सेआ जे पंजाब च मुंजी दी अधिकारिक खरीद दी शुरुआत पैहली अक्टूबर थमां होई ऐ। 2 ज्हार 700 मंडिएं दे राएं खरीददारी दी प्रक्रिया गी जकीनी बनाया जा करदा ऐ। उनें आखेआ जे सितम्बर म्हीने तेज बरखा ते मुंजी च बड़ा मती नमीं करी फसल दी बाड्डी ते खरीददारी च चिर लग्गा। जोशी होरें गलाया जे 50 लक्ख मीट्रिक टन मुंजी दी खरीददारी होई गेदी ऐ।



## Japan Election

जापान दी सत्तारूढ़ गठबंधन सरकार ने तारें होए दे राष्ट्री चुनावें दौरान संसद च अपना बहुमत मुआई दित्ता ऐ, जेह्दे कारण उत्थें अगली सरकार बनाने च जक्कोतक्की दा माहौल बनी गेआ ऐ। कुल 465 संसदीय सीटें चा 20 छोड़ियै प्रधानमंत्री शिगेरू इशीबा हुंदी लिब्रल डैमोक्रेटिक पार्टी ते म्याल पार्टी कोमिटो नै 209 सीटें उप्पर जित्त हासल कीती जेह्डी पिछली बारी जित्ती गेदी 279 सीटें थमां 70 सीटां घट्ट ऐ। चुनावें च प्रमुख विरोधी पार्टी कांस्टीट्यूशनल डैमोक्रेटिक पार्टी ऑफ जापान नै शानदार प्रदर्शन करदे होई 143 सीटें जित्त हासल कीती, जेह्डी पिछली बारी जित्ती गेदी 98 सीटें थमां 45 बद्ध ऐ।



## Jatinder Space

सूचना ते प्रौद्योगिकी मंत्री डॉ. जितेन्द्र सिंह होरें आखेआ ऐ जे भारत दी अंतरिक्ष अर्थबवस्था मुखें दे विकास च मता महत्वै आला रोल अदा करोग। इक प्राइवेट मीडिया कन्नै अपने इक इंटरव्यू च डॉ. सिंह होरें आखेआ जे सरकार नै अंतरिक्ष क्षेत्र लेई इक ज्हार करोड़ रपे दी रास पूंजी लाई ऐ ते बायो ई-थ्री पॉलसी बी शुरु कीती ऐ, जेह्दा मकसद जैविक अर्थबवस्था तैआर करना ऐ।

मंत्री होरें इनें पैहलकदमिएं पर लोह पांदे होई मंत्री होरें आखेआ जे इंदे नै ना छड़ा भारत दी साइंसी दक्षता होर बधोग सगुआं एह टिकाऊ ते आत्मनिर्भर अर्थबवस्था तैआर करने च बी योगदान देग जेहदे नै उद्योग ते संस्थानें दे क्षेत्र च भारत विश्व स्तरें पर होर अगड़े बधोग।



## JK-Arrest

जम्मू कश्मीर पुलस नै उत्तरी कश्मीर दे हंदवाड़ा थमां आतंकवादी दे इक सहायक गी गिरफ्तार कीता ऐ। ओहदे कब्जे थमां सुरक्षा बलें असला ते बरूद बी बरामद कीता ऐ। इक टकोह्दी सूह पर कारवाई करदे होई जम्मू कश्मीर पुलस, राष्ट्रीय राईफलज ते सीआरपीएफ नै आतंकवादिएं दे सहायक गी चानचक्क लाए गेदे इक नाके थमां फगड़ेआ। तपाशी दरान ओहदे कब्जे थमां असला—बरूद जेहदे च इक पस्तोल, 2 मैगजीनां, 12 रौंद ते इक मोबाइल फोन शामिल ऐ, बरामद कीता गेआ। हंदवाड़ा दे पुलस थाने च इस सरबंधे च मामला दर्ज करी लैता गेआ ऐ ते जांच शुरू कीती गई ऐ। एह अभियान राष्ट्र विरोधी तत्वे गी जड़ थमां खत्म करने प्रति जम्मू कश्मीर पुलस दी वचनबद्धता गी दर्शांदा ऐ। पुलस ते सुरक्षा बलें आम लोकें आस्सेआ लेइएं जानकारिएं दा सुआगत कीता ते भरोसा दोआया जे इंदे पर बनकदी कारवाई कीती जाग।



## Table Tennis

टेबल टेनिस च यशस्वनी गोरपड़े ते कृतविका राय दी भारतीय जोड़ी नै इटली च खेड्डी गई डब्ल्यूटीटी फीडर कैगलियारी प्रतियोगिता 2024 च महिला डबल्स दा खिताब जित्ती लैता ऐ। भारतीय जोड़ी फाइनल मकाबले च दक्खन कोरिया दी यू—सीवू ते किम ह्यूैन दी जोड़ी गी 3—1 कन्नै हराया।



## Wrestling U-23

कुश्ती च भारतीय पैहलवान चिराग नै अलबानिया दी तीराना च खेड्डी गई अंडर-23 विश्व कुश्ती प्रतियोगिता दे फाइनल च किरगीस्तान दे अब्दुमलिक काराचोव गी मर्दे दे 57 किलोग्राम फ्रीस्टाइल भार वर्ग च हराइयै सुन्ने दा तगमा जित्ती लैता।

